

小峴山人詩文集

小峴山人詩集卷十

無錫秦 瀛凌滄

靈隱寺

飛翠寺門幽江光抱佛樓觀空現龍象說法拜獼猴泉
似唐時冷天將竺國秋登臨意何限有弟在南州

嘗與舍弟

小泗游此
今在江左

壑菴訪破公

萬壑一茆菴青山屋後嵐松風溪互蒼僧偈石同參腳
踏栽帽雪心飯玉女潭

破公曾游栽帽
華嚴諸勝處

此間容小住許

我共禪龕

韜光寺

深竹不知處半山逢寺門
烟中一僧引屋外龍泉喧絕
壑得幽境高齋聞道言將尋
白居士相與證風旂

韜光靜坐和高忠憲公韻

石壁嵌精舍高僧禪誦餘
清心息羣役獨悟天地初
林下誰煮茗流泉繞堦除
寂寂佛花散沈沈齋磬疎
大道泯聞見語默皆晏如山
禽破幽閒松月涵空虛我欲
謝塵服長此誅茅居

偶題山寺

新詩題徧碧山秋多少
因緣古寺畱可似東坡老居士

前身我亦到杭州

葛嶺

秋殘古寺葉飛黃湖水穿籬過壞牆丹汞難尋仙令尹
青山莫問舊平章金甌半壁笙歌地燈火中宵蟋蟀場
趙宋興亡彈指事一僧無語立斜陽

秋日邀同潘德園王妙聞鮑綠飲陸古漁項秋子
邵右菴戴松門泛舟湖上過淨慈寺茶話有作

挈侶言登郭外舟迎門開土得湯休斜陽滿院石幢冷
空翠一房林磬幽閒訪名山多住佛老來詞客不宜秋
煎茶漫說無生諦黃葉蕭蕭打白頭

送謝蘇潭之山右

仕宦到西湖人生偶然耳君昨銜命來於古爲廉使

姦貪去蝟虱靈猾掃糠粃經術本漢儒著作補魏史

新君

成西魏書補

官閣近錢唐坐對湖山美高峯何婉孌澄波何

迤邐賓從迭唱酬騷雅乃餘技緬彼白與蘇風流繼前

軌皇恩只一年踪跡雪泥似

君留別詩有鴻泥曾印六橋來句

西湖

解送君含情渺烟水

冀州古名區上黨天下脊地維絡景霍河流貫汾澤極

土稱白壤膏腴錯疆場貢賦惟上上大陸沃且碩帝

命君旬宣往哉奏乃績唐魏歌山樞遺風號儉嗇近來

俗類嬪變化資牧伯儉貴示以禮布教徧蒼赤彼都囂
來踪此邦恨去跡矧余忝同岑握手情脉脉他時寄我
詩春流晉祠碧

感懷

人生不滿百苦樂恒相隨歲月如脩蛇一去不可追感
此凜秋節涼風動杲恩敗殲啼蛩蟻空房落蛭蟻荏苒
歲云晏斜日逼嵒嶺念我同袍人黃泉無見期莊岳縱
可擊吾意何時衰

團團桂之樹玉露皓方潔階前芙蓉花秋風不堪折韶
華尚如昨冉冉變霜雪人生非草木萬想安得滅以茲

增百憂肝腸中斷絕

商飈起虛廊天氣日以肅忽聞哀鴈鳴嘹唳下川陸斜
景不少駐去去安所逐滅沒寒葭叢清唳時斷續如悲
失羣侶孤絃彈別鶴有人背燈坐切切感幽獨風高吹
爾瘦何處烟中宿

署齋邀王妙聞蔣再泉家梧園賞菊

畫闌西角夕陽昏惱客秋聲木葉喧華髮心情還對酒
菊花天氣最銷魂王郎拔劍歌能否蔣詡懷鄉徑尚存
多謝髯翁爲招隱扇頭潑墨寫家門

時梧園貽予山水畫扇

西湖獨汎

懶上西湖湖上舟夜來孤夢冷于秋錢唐門外盈盈水
不照人間共白頭

王述菴先生引年退休來游武林飯僧雲樓寺余
以事牽未得往訪以詩奉寄

漁莊百尺弄漁簪

先生有三
洲漁莊圖

蓴鱸秋風想季鷹應有心

情還戀 闕九峯殘月夢觚稜

聞公縱櫂到西泠拄杖雲嵐入眼青遙憶上方高處宿
松潭佛火亂寒星

又寄述菴先生

雲棲古蘭若江上鬱崇嶺森然穿綺襜墮地碧雲冷公

本住世人來宿招提境此時寒山空禪燈一龕靜知公
萬想滅獨禮金粟影心與潭泉清道契巖月同戒今嬰
世務塵慮安得屏緬懷繕性者聞鐘發深省

送破公游四明

落日曹娥廟空江生夕陰遠公飛錫去雪竇萬峯深問
法參獅座譚禪見虎心遙知尋舍利重宿古祇林

陳華南爲余寫西湖獨汎圖因用前韻又得一首
分付西泠舴艋舟載將別恨送殘秋六橋一片傷心地
暮雨瀟瀟竹閣頭

喜黃九同年過訪

當時嚴譴亦君恩況又生還入玉門萬里無家巢已破廿年多難骨猶存鬢髭盡染窮荒雪妻子誰招故國魂慷慨從軍餘意氣一燈如豆話黃昏

吳蠡濤自粵東以詩見貽用韻奉寄

平生詔好奇足未到南海但誦南海什真氣泝真宰庚戌秋在京師得見蠡濤南海詩荏苒七八年流光不相待相逢西湖濱

握手鬢髭改觴君湖上樓積懷慰飢餒柳下畫舫移竹裏清尊在昔時同省客今各服獬廌秋中暑未褪盤礴衣共解盡弛後輩禮脫略不余罪畱君擬十日江上舟又買途中寄我詩發函虹煥彩別時桂方花今已梅破

蕾昨夢汎珠江。蠻人歌歎乃荔支飽啖嚼。鱉簪入菹醢。
夢醒和君作詩成。翻自悔蕪陋等五礫。何以敵珠璣。

爲錢梅溪題其尊人養竹山房圖

養竹主人善養竹。蒼筤滿塢湘雲綠。近同里閭余未識。
却向圖中見寒玉。舊澤留貽憶賜券。清風披拂羞食肉。
一叢煙抱伯鸞谿。數竿翠掃愚公谷。主人有子能讀書。
家藏萬卷書連屋。爛編蝌蚪辨史牘。瑣碎蟲魚箋郭璞。
荒冢還尋斷碣文。閒牕自輯名山錄。養竹主人今在無。
山房人去悲風木。圖中添染竹枝斑。灑徧青筠淚盈匊。

答李少鶴卽用來詩原韻

故人羈宦天南陬蠻花犵鳥增離憂何幸尺書託雙鯉
萬里遠寄來杭州故人詩人更循吏治行卓卓誰能儔
荒徼窮黎苦疲瘠良藥要使邊氓瘳國家愛民設民
牧奈何賊虐同蝥螋篇什諷諭過元結輶軒採風應見
收我叨監司浙西路比戶難免還呻吟憂財賦重區說三
郡俯對蒼赤良懷羞故人詩中頗相勗慙慙致語如面
謀却望灘江隔烟水平生未向蒼梧游

檢得內人遺扇

不道搜遺篋無端淚濕衣尚留華扇在已恨故懽非雙
燕窺簾去孤花入戶飛當年庭畔立素手憶曾揮

再過吳興用趙松雪飛英寺韻卽簡陳無軒學博
家園百里未歸何重向吳興鼓櫂過玉局曾游春夢斷
王孫一別亂雲多迎人山色濃於黛送客溪光薄似羅
惆悵閉門無已在不來同問趙鷗波

歸雲菴

高人孫太初曾此訪僧居落葉已橫徑歸雲常繞廬泉
流雙屐外松影一瓢餘爲道春來好梅花更可鋤

壽顧涑園八十

涑園曾官廣州守今大司馬石君朱公受業師

鳩杖從容絳縣年飄蕭白髮已三千昔聞南海歌生佛
今向西湖號散仙弟子勲名侔柱石先生著述富雲烟

明朝共訪留題處高會羣真有洞天

余近有壑葬留題之作涑園和焉菴

在小有天園之左

海寧舟夜聞鴈

澤國聞孤鴈哀吟逐短篷五更山月暝萬里海雲空暮影行先斷么絃響未終淒涼無限感併入此聲中

寒夜寄淨慈寺長老

木落霜高萬壑重清波門裏又聞鐘高僧夜半禪初定月出東南荔子峯

大慈寺

初日照南山殘雪猶在巘循崖探虎跑蒼翠條凌緬古

藤夾石梁落梅覆苔蘚寺隨修竹深徑與流泉轉入門
間無人風送鳥聲善山僧揖余罷一勺煎苦薺坡公題
詩處斷碣字可辨良游申後期卽景疑夙踐烟嵐知幾
層翻嫌入山淺

偕胡雛君登冷泉亭觀飛來峯探呼猿洞

春鳥喚游屨山行愜遐尚車騎一以屏言持方竹杖亦
有龍眠人空亭同頽仰澄澹碧練光清冷氷絃響泉從
洞底出雲破崑角上石竅風徐舒樹隙日晃漾峯自竺
國來軒翥難具狀峽坼開堂墮壁削壓額顙造物頗狡
獪搏弄出榛莽苟非守象獅或恐攫魍魎何年忝鑱鑿

鎮以維摩像飛來不復去鬼物莫能攘璫瓏入古穴窳
篠迷前嚮崖垂忽中斷竇暗復外朗我欲飯猿猱人誰
供菓橡理公此物化高僧邈方丈矯首望韜光籃輿誓
欲遄夕陽忽西墮暮色失篠簜趁此腰脚健後約訂吾
鄰

感舊

淒涼舊事忍重論感逝傷離易愴魂可似宮人說天寶
略如朝士話貞元簿中點鬼留詩本酒後看花有淚痕
無那春宵腸更斷打窗風雨又黃昏

春寒

東風吹上雪橫斜夢冷孤山處士家最是春寒禁不得
夜來凍損小梅花

雨後西湖汎舟

濕雲濛濛白於絮煙中惟有篙師語須與烟霽逗微陽
嫵媚春山鬢初吐春山如笑隔花立隄上花風知幾度
落紅飛過西泠橋擢入落紅深處去

約阮芸臺學使泛舟西湖學使以詩見贈和韻酬
之

偶乞西湖共往還宦游難得此偷閒纔登白傅堤邊舫
已入王蒙畫裏山好句忽來梅影外

學使並以畫梅簾子見貽深情

多寄冰雲間尊前却憶簪毫日各有春明夢未刪

爲破公題伏虎圖小像

宋有伏虎師飛錫五雲駐寥寥七百年公復湖上住一
龕隱寒松南屏自朝暮山雲入鉅拂天花隨杖屨能令
虎心善聽法了無怖茫茫苦海中迷津安得路仗公大
願力欲以慈筏渡憐余嬰世網與世多錯愕終當從導
師階石此同悟

重摹先淮海公遺像以石刻寄處州嵌置圭山蓮
城書院之壁蓋公嘗貶處州監酒稅余將卽圭山
爲公祠也別以榻本贈嘉禾沈帶湖帶湖用坡公

與先淮海唱和詩韻見寄余和韻荅之卽書榻本
後

元祐黨籍紛竄投我祖貶謫同罹憂烏紗墮地老不侯
却作酒星來括州官閒翻賴奸回力彌勒同龕依淨域
謗書日下那飛騰水蠟腹蛇尤莫測山僧留像何多情
優曇花開花滿庭嶺海飄流古藤死微雲尚抹蒼嵐青
昨年行部青田縣石泐祠荒辜夙願何幸堂堂遺貌存
武林公廨今重見

像爲族祖雲錦所藏
持以見示因刻石

鐫工摹勒肖逼

眞鬚眉拜識疑天人蘇門君子淮海傑常使照耀圭山
新七百年來事頻換往蹟銷沈難具竿若箇題詩託鯉

魚三過堂前春水漫

卽事

小病齋頭剛十日藥爐經卷頗相宜春風不覺鬧如許
已放烏桃三兩枝

雨歇

雨歇湖干放畫橈東風搓出柳千條春陰如夢雲如墨
綠過西泠第二橋

繇法相寺至陶莊

岩峩青蓮界僧定聞齋鼓滿空旃檀香法華落如雨紆
軫歷危磴仄徑破叢莽寒翠忽侵衣亂竹塞深塢紛紛

落蒼雪不知日亭午意行抵山莊空巖鑿鬼斧怪石橫
古楂暗泉滴細乳絕頂孤亭在萬象森肺腑遙矚錢唐
江江光但一縷何當御風游飄飄生毛羽

聽泉

山谷腹衆竅元精孕層巒嵌空乳竇洩的皪礪苔泣潺
潺憑壑瀉泱泱隨崖轉鏗爾曾瑟希泠然列風善松下
吹去聲互畚石罅響屢變清籟從何來真源杳莫辨大易
占蒙泉微義誰能闢我欲叩虛牝坐聽煩慮遣

遙送潘德園侍御過富陽

扁舟此去富春郭七里之瀨吾曾經灘光忽浸半身綠

山色亂壓孤篷青高揖桐君雨漠漠大呼臯羽煙冥冥
明朝題詩向何處應和夜猿吟翠屏

贈奚山人鐵生

下簾終日閉柴關
幾几繩牀竹石間
想得詩人醉吟處
隔江閒寫富春山

底勞小隊訪郊垞
野鶴閒雲非世情
可似荆蠻癩居士
不教識面但聞名

釣絲煙裊綠楊低
寫出春波拍岸齊
記得畫中詩句好

一篷寒色過苕溪

鐵生近爲余寫春谿垂釣圖
第四句則其題畫舊句也

孤山西去六橋東
載酒相期喚短篷
醉向夕陽樓上坐

亂鶯啼破落花風

送破公之天台

師從四明返又入沃洲山天姥月初上赤城雲欲還言
尋太乙子來往石橋間松樹幾千尺翛然鸞鶴閒

春日襍咏四首

潢池兵起近如何三楚烽烟赤羽過王粲樓前新草檄
伏波營外尚橫戈地連襄漢防宜急天入巴巫險更多
帷幄持籌煩廟算早傳禁旅下淖沱

昔年紅藥禁中郎偶爲春行綺陌香隔屋杏花飛雉子
連邨柘葉祀蠶娥人攜樽酒風吹盎客餉新茶月映筐

眼底江鄉多樂事，催科莫遣打門忙。

迂疎甘載笑，儒冠祇覺蒸枰下手難。敢以經師稱弟子。

謂曾鯨堂袁陶軒

漫將名士作衙官。

謂富陽令憚子居孝豐令李許齋

關心民

瘼，逢人問過眼花光。隔霧看

時病目

兩鬢蒼浪，吾老矣生

涯，只合問漁竿。

鶴脫樊籠馬脫銜，鄉心長傍歷山巖。挂冠此日歸疏廣。

把臂何時挈阮咸，舊里重開松菊徑。故人多著芟荷衫。

謂顧譽泉諸君

煙霞莫戀西湖好，笠澤風濤趁夕帆。

時都轉叔父將引疾

里歸

題扇寄嘉興伊太守

寄將屏面託詩筒春水鴛湖脉脉中憶得焚香衙鼓靜
要君持此屬仁風

本覺寺前訪坡老梅花菴邊尋仲圭公暇知君吟興劇
新詩一幀寫鵲溪

詩人才吏兩無慙移郡新來長水南桑柘陰陰石門路
風光四月正宜蠶

年來作宦徧吳會勝地東南懷袖間煙雨樓頭重回首
揚州風月冶城山

題宋高宗手書賜岳忠武敕後

渡江泥馬王孫泣汴水銅駝委荆棘長城惟說岳家軍

鐵浮圖軍撼不得吁嗟岳侯真人豪誓清河雒恢神皋
岳侯一去大樹死遺敕空聞傳宋高十二行中字參錯
紹興六年五月作岳侯喪母返廬山立趣登車賜褒鄂
墨纓視事古豈無守經行權理不殊岳侯固是忠孝者
捧敕慟哭仍長駢盡孝於忠君所教守經行權盡孝于忠皆敕中語君
王何廼偏忘孝背鬼頓棄鸛鷺羣蒙塵竟老冰霜窖輸
金輸幣只偏安猛虎就縛妖狐謹窗邊姣婦能張舌帳
外書生解叩鞍三字冤成莫須有烏虜此敕終長負青
城不返二帝魂黃龍誰飲諸君酒

舟葬

荷氣過飛雨晚涼溪上生
權歌凌浦亂漁火隔村明
欲與榜人語無勞津吏迎
多慙垂釣者猶是滯浮名

富陽寄朱麗皋金華

曉色滿孤舟潮聲郭外流
江雲方變夏山雨忽如秋
已近嚴陵瀨空懷沈約樓
知君吟眺處回望迴含愁

西小江

一棹入烟水禽相向飛巖陰
團竹港樹色鎖邨扉
日曬漁人網風吹浣女衣
若邪溪上去朝夕弄清暉

海昌舟夜

時患旱

中夜苦無寐篷窗微露侵
漫持巡海節方勘海塘不盡憫農

心古港河流淺荒亭漏鼓沉惟聞桔槔響愁坐對橫參
曉出清波門循湖行

夏寒襲人衣曉行西湖路耿耿缺月在湖波曳輕素霏
微竹間烟的礫荷上露繞礪泉暗流出塢鐘徐度山禽
忽驚喧林深疑風雨却望兩高峯猶隔南屏樹

夏日游靈隱寺同華秋槎項秋子邵右菴作

亂山影裏欵禪扉應上高樓看翠微樹杪半杯滄海瀉
門前一道冷泉飛竹深別院逢僧話松逗殘陽見鶴歸
揮手何時官事了諸公同著薜蘿衣

嘉興舟夜

芰荷十里映垂楊，鼓櫂重過橋李鄉。沙市漁燈明遠岸，
溪橋酒艇過橫塘。亂蟬幾處暮雲暮，短筇一聲長水長。
無那清宵獨眠客，怕看涼月照鴛鴦。

憶先妻也

袁陶軒秀才示余錢文端公題碧山吟社圖詩，感而有作用文端韻。

尚書題句賦林泉，碧社于今幾百年。詩酒風流推老宿，
衣冠圖畫儼神仙。蒼松月照寒巖上，脩竹雲移曲磻邊。
亭榭久荒龍縫在，山中猿鶴勸歸田。

今春顧響泉先生來武林，促余重修。

吟社未遑也。

飲酒行贈何布衣

琪

交酒跌宕年少日座上時時逢酒客歲月荏苒華年徂
朋舊大半歸黃墟近來我已罷觴酌不知誰是高陽徒
錢唐詩人何大復一飲能傾酒一斛罵坐時聞灌夫語
窮途那免唐衢哭烏虜何君何君奈爾何朱顏已去白
髮今蹉跎酒酣拔劍斫地徒悲歌區區知禰不能薦何
君何君奈爾何

訪主雲上人

挂錫南山岑石幢深復深湖光寒佛座竹色淨禪心我
訪白雲去寥然清磬音空齋罷參後蘸筆杪樞陰

上人
工畫

山水

梅莊訪陳華南二首

車馬不到處數弓開小園雲深沙鶴立雨歇竹禽喧塔影斜通塢湖流半浸門詩人兼吏隱坐對已忘言

傳是蘄王宅投閒有故墟中原誰飲馬南國想騎驢大樹今何在荒原此卜居英雄竟已矣君自愛吾廬

題汪稼門方伯西湖詩後

浙右號勝區尤數錢唐美環以明聖湖郭外浩烟水石函香山誌六井玉局紀祠或頌靈胥觀或表錢氏或銘虎跑泉或記龍泓沈武林辨屨屨羅刹賦迤邐一自唐宋來文章燦霞綺方伯皖桐彥堂堂佩金紫手攜崢嶸峒

雲足踏臨洮壘移藩自皋蘭持節到湖汴屐擬謝客登
舟比郎官艤地脉溯其源水利導其委山川旣蟠胸烟
雲遂滿紙西湖全面目收拾在尺咫懷古多遙情取鑑
寓深旨半壁憶偏安中原方殿屎嬉遨歌舞劇輪幣繪
帛恥背嵬棄長城騎驢老居士奸回沸蜩蟬邦家生瘡
痕格天肖林甫賣國等宰嚭犬嗥邨舍間蟀鬪秋堂址
俄聞臯亭敗旋見大廈圯荒江叫白鴈故苑眠蒼兕弓
劍遺民悲魚盃諸陵燬吁嗟趙宋事歷歷篇什裏勸懲
擬風人法戒嬖詩史時代有興革湖山無成毀虹垂六
橋亘霞標雙堦峙疊蒙翠華臨丘壑澤咸被璇題

燭霄漢照耀徧遐邇吾輩職守土曷以繼前軌三賢流
風存千載誓宗祀厥功首開湖灌溉實賴此今年秋稍
旱啓牘捷如駛薪積水易淤疏濬民所企何當亟籌度
益以利耘耔君詩垂不朽勒石匹泰時

方伯有泰
山詩石刻

爲周松靄題岑溪三賢圖

高密李少鶴我之齊年生嘗宰山水縣其政廉且平爲
文記三賢歌辭何鏗訇三賢者誰氏劉

信于烜

播先聲

周君實繼之官比岑溪清化俗務揖讓催科戒笞撻不
飲盜泉水不羨黃金簾烹鮮雖小試弗媿循良名劉于
久云歿君今老柴荆當其去職時琴鶴歸裝輕畏壘有

戶祝遺愛在邊毗我昨過鹽官訪君海上城屏騶入委
巷白髮倒屣迎君方事纂述卷軸殊縱橫出示三賢圖
清風響泠泠灘江環堦除蒼梧挂簷楹隔竹鷓鴣叫繞
屋桄榔榮侏僂椎髻者載拜薦杜蘅官旣不負民民亦
傳公評留祀朱邑並繪像文翁併披圖再三歎令我心
忤忤監司我忝竊五郡揚雙旌余由溫處遷杭嘉湖道自顧百無
善慙懼徒交縈豈期得虛譽道路稱神明至今甌江上
獻曝輸精誠溫人刻甌江載德圖贈余乃知三代直古道今猶行如
鐘響斯應如水流必盈居高聽不卑曷以通輿情君其
示周行曷此金石盟緘詩寄少鶴萬里雲英英

石門舟夜

九月蒹葭冷江南秋已淒何人歌子夜一櫂語兒谿荒
驛鴈初下前邨烏欲栖沉沉聽戍鼓月落女牆西

秋蛩

切切寒螿訴不休尊前弔影夜窗幽月明敗蘅蠓蛸夕
露冷空階絡緯秋殘角亂吹孤夢斷荒砧併入一燈愁
右丞詩與歐陽賦難遣黃金換白頭

秋扇

不信炎涼似轉輪又看棄置到蕭辰漢家明月辭深殿
江上秋風別故人殘蝶化來都作夢流螢乾盡已成塵

殷勤幸有他年會勝小來生未了因

秋鴈

昨夜西風動羽翰數行驚起下前灘天高九月書偏少
木落重城酒易殘白草黃沙開塞遠冷烟斜日洞庭寒
不勝清怨聽嘹唳回首何人更倚闌

秋燈

秋影昏黃半地時闌干西角畫簾垂荒江古驛人如夢
落葉疎窗雨似絲雙鬢心情新鴈語五更消息亂蛩知
照他憔悴同元相挑撥間愁好寄誰

薄暮過東湖月出繫舟弄珠樓下作歌

東湖日落烟滿湖漁菴蟹舍迷菰蒲水邊拍拍驚鷺鳬
採菱人在烟中呼烟中皓月忽飛起素練冉冉生須臾
沈寥倒影水紋淨一奩寒玉光平鋪神女乘潮出游戲
團團手捧鮫人珠金支翠旗杳何處馮已夜舞驪龍趨
松杉四響鸛鶴叫天半一一吹笙竽鸚鵡喚客且一醉
嘉禾三白名酒可沽樓頭鐵篴再三弄闌干十二秋雲
孤隔渚漁燈隱沙市對岸塔火懸浮圖天明篙師解纜
去秦駐一髮青糝糊

秋日偕華秋槎徐惕菴陳桂堂邵右菴游韜光菴
我愛韜光路登山不厭勞寒泉奔礪落亂竹入門高靈

藥從仙乞塵心向佛逃金蓮池上坐天地一秋豪

唐時老佛子挂錫此誅茅石與雲爭席僧將鶴共巢江
光千樹表梵響亂山坳又別烟嵐去斜陽在屋梢

爲胡雒君題匡廬識面圖時雒君將歸桐城重作
廬山之遊卽以送之

疊嶂屏風青未了曾向潯陽揖五老五老雲中解笑人
布襪青鞋苦不早胡子天下士高卧龍眠春汎滄江
上曾識匡廬眞怒潮九派浸突兀飛瀑三峽懸嶙峋栖
賢寺前凌絕壁下俛玉淵潭水碧不識太白何年遊松
風萬壑聲颼颼君歸重問康王谷白鹿洞邊騎白鹿匡

君山頂坐招要倘遇仙人髮應緣

荔支石爲陳古華作

古華蓄石一形似雙荔支石上鐫有寶晉齋及
殿中之寶二小印殆米襄陽物也

襄陽後身古華子怪石斑斕陳棐几疑是炎洲羅浮之
所遺不然閩海飛墮血色紫垂垂葉如可摘離離實如
可食混沌鑿破山鬼愁幻出星精一卷石不是仙人不
敢餌座上清風生兩腋寶晉齋讀書窈窕千載真好
奇殿中之寶今日果有之袍笏下拜吾其師

讀書窈窕古
華家舊齋

寄楊甫

之子客燕久扁舟歸故廬秋風三百里不寄一行書爾
聽華亭鶴我懷笠澤漁雖然滯簪紱已與世情疎

余有事於海鹽過嘉興舟泊西門外馮孟亭先生

暨沈帶湖錢裴山過訪旋解維戴生

光會

送余至

烟雨樓下嘉興秀水平湖三令先艤舟以待余張
帆逕過不復登以詩誌之

不盡南湖繞岸流故人分手又津頭飛來檣李城邊雨
吹過鴛鴦水上樓夜火影懸孤塔迴寒蘆聲入萬家秋
多情最是蕭疎柳不解長堤繫鷁舟

浮生

浮生萬事總悠悠
樺燭珠簾一晌休
春水尚思魚比目
秋風怕見橘駢頭
海邊精衛難填恨
天上黃姑不寄愁
今夜月明誰徙倚
徒傳西北有高樓

嘉興送綳武還無錫

江雨冷丹楓
鄉心逐短篷
長亭七十二
送汝過垂虹
母已歸泉穴
兒應告殯宮
爲言經歲別
雙鬢又秋風

秦駐山

華陰山鬼遮秦使
沙丘輶涼祖龍死
輦道猶傳駐翠華
靈藥何曾獻徐市
憶昔東巡萬騎喧
滄海日射如車輪

赭鞭鞭石石亂走直駕鳳最乘鼉鼉中原逐鹿今何有
三泉水洞陰風吼阿房宮已盡成灰安論紅顏葬荒阜
巖花還似美人容巖月曾教照六龍子規夜啼翠微裏
廟門寂寞鎖深松

山有始
皇廟

海鹽四絕句

烏夜村邊烏夜啼垂楊蕭瑟女牆西欲尋驃騎前朝事
風雨長秋夢已迷

東吳人物幾英雄青草原頭弔呂蒙野火燒殘荒冢在
馬嘒城上又東風

逋翁舊宅閉蒼苔雙峽雲峯護石臺疎磬數聲啼鳥外

夕陽閒殺讀書堆

三秋泛月永安湖
太白山人今已無
獨上鷹窠山頂望
五更海日射珊瑚

譚仙嶺

仙人騎鶴去不見
仙人還猶聞鍊藥處
白雲空自間登
高望滄海落日在遠山
華髮不再黑悠悠元化間

裴山農部示余竹垞圖輒題四絕

金風亭子小長蘆
前輩書堂剩畫圖
千箇簣簣數間屋
瀟湘烟雨碧模糊

百字清詞唱曉風
後來詞客句還工

農部有和先生自題竹垞圖百字令

詞一 農曹祇笑貧如許不向南垞買半弓

杜陵老去夢歸遲曹霸丹青頗擅奇淮海阮公真好事

披圖重與寫烟枝

謂芸臺學使

南湖烟月淡郊坰使者年年白舫經一角斜陽如畫裏
西風吹老曝書亭

偕華秋槎項秋子繇過溪亭至龍井

入山徑已深愛此閒亭廣白日照林薄清泉時見漾僧
憩石梁語人踏翠微上辨才不可見虛堂徒偃仰我本
住世者冥心絕諸妄旃檀生妙香蓮花得空象坐聽風
中簞下山復惆悵

鉢池菴

殘葉響空林斜陽照橫策言尋古蘭若窅然蒼翠積不
辨竹間徑欲往迷所適經聲出雲厂茶烟拂禪席潺潺
籬根泉寒池浸幽碧

繇靈隱至永福寺

山禽導行憶與我話南能竹密已無路烟深惟有僧危
嵐射微旭夾澗響寒冰石筍疑人立招要最上層

長至後二日華秋槎招同王妙聞陳華南查梅史
放舟至孤山探梅卽與妙聞餞別

西湖如故人況有湖上友今年殘臘天氣晴放船同到

孤山口孤山試訪山中梅山中梅花還未開咸平處士
骨已槁空庭老鶴徒裊裊幾樹槎枒插晴昊花未開時
看亦好一僧獨立荒祠邊滿塢白雲閒不掃秋橙爲我
開清尊急鬥新句催花魂不惟催花兼送別有客明日
歸江邨座中誰是林君復人道使君如玉局年年不厭
孤山游日煮寒泉薦秋菊

瀛官武林每遇先大夫先恭人諱日禮佛于淨慈
寺之無量壽佛堂謹賦

人生風木悲百年無時休人生霜露感何論春與秋哀
哀我父母白首歸林邱漠漠梁溪長宵宵橫山幽年來

小坡山人詩集 卷一
缺瞻拜鳥鳥啼松楸愴茲逢諱日寒淚還雙流劬勞罔
極恩欲借空王酬佛聲普浩浩磬響來悠悠爲闡無量
法便證無上脩曇花忽湧現白雲滿四周皈依有淨域
極樂西方游

張伯雨墓

層疊岡巒鎖白雲斷碑何處臥斜曛松花滿地春流轉
中有茅山外史墳

送曾鯨堂之江西

白髮成吾老青衫念爾貧時方重儒術天豈困斯人書
劍行裝儉江山賦筆新豫章逢阿弟爲我說艱辛

謂余弟小

泗

張山農部見余題竹垞圖詩以七古見貽和韻答之

農曹胸有千畝竹便便腹書亦可曝囊慳只欠趙壹錢
南湖無地容卜築日下歸來梅會里一片斜陽照人目
金風亭長去已久詩魂重弔滄浪曲琅玕滿塢翠掃天
卷中忽墮湘雲綠我詩嘲君聊一哂君還嘲我同捧腹
何時却買陽羨田絕勝東山絲竹肉但得十笏營蝸廬
閉門著書願亦足應笑杜老真狂癡突兀還思萬間屋

感事

一覺黃梁夢易殘紛紛蕉鹿苦無端應知爛額焦頭易
祇覺抽帆到岸難自古憂危驚厝火幾人忠信涉風湍
惟將虎尾春冰意老易深林一卷看

時余作秋
林讀易圖

歲暮有感

三十餘年事傷心事事真白頭空有約青鏡已無人幻
妄他生夢艱難未死身燈前兒女在且莫淚沾巾

梅花二首

羌篴欲三弄梅花開一邨思君寒有夢見爾澹無言明
月忽橫徑春風先到門疎枝不堪折驛路幾銷魂
有客空山住春來不出邨寒流鳴瀼瀼如與梅花言鳥

啄籬遶雪人窺竹裏門咸平醉處士寂寞伴詩魂

吳山懷古

盤磴危峯迴登臨亦壯哉江山銷霸氣天地腹庸才雲
表孤禽下潮頭萬馬來斜陽縣木杪莫角不勝哀

贈涉園主人張桴亭

涉園園中雲鏹石石邊昨夜梅花開

石即查氏故物

君在梅花

香裏住海潮飛上伯牙臺

書事

戍鼓喧裏鄧新移大將營三苗方震讐羣盜敢縱橫國
法先誅叛天心欲解兵斯民皆赤子何獨外生成

聞道三巴卒仍連漢郡西經年竄蛇豕計日蕩鯨鯢劍
外弓刀壯關中鼓角低休烽喜春及買犢事耕犁

徐惕菴示余去濟南時荅友贈別之作輒書其後

得二首

歷下亭邊感別離篋中幾許送行詩一生自詡魯男子
三黜人稱柳士師公道尙留童孺口直聲已荷聖明
知樽桑日出青銅照不用楊朱泣路岐

訪我重過江上城尊前康濟說蒼生庚桑大有齊民祝
丙舍難忘舊日盟不盡雄心看劍匣漫將冷眼認棊枰
九峯如畫柴門近糴稭秋風約耦耕

冬日訪破公於南屏僧舍却憶德園侍御在松江
昨與南屏約欲訪南屏僧殘雪中磬空山定裏燈人
叅法界寂鳥悅道心澄安得潘居士同來證大乘

爲華秋槎題石門觀瀑圖圖爲家梧園作

浙東瀑布稱最奇天台鴈宕一一天紳垂更有括蒼石
門最高處飛流出峽噴珠璣我昔過彼曾賦之獨坐石
門之下拂拂長風吹非烟非霧裊空際欲落不落搖林
霏誰把滄溟水一剎潑向峯頂翻天池不然銀潢屈注
幾千丈忽作奔雷急雪直下春雲扉有時盤渦突起兩
崖鬬疑是藤蘿絕壁蟠蛟螭別來荏苒已三載回首名

山空巖巖今朝忽墮石門邊圖畫居然睹崔嵬畫者誰
家梧園當年潑墨偶爲華君作此本梧園雖死淋漓元
氣今猶存披雲捫葛疑可上樹杪匹練懸流泉臥游如
此意亦足兩耳彷彿聞清猿更煩好手爲我寫尺幅張
之素壁終日如聽驚瀧喧

謝蘇潭移任浙藩聞其將至以詩迎寄

誰道 皇恩祇一年

前蘇潭司
浙臬一年

西湖重見擁旌旃謝安

早負蒼生望白傳難忘勝地緣夢憶寒流晉祠雪尊開
春樹越江烟只看幾疊青山色無恙迎公畫鷁邊

慈谿鄭秀才

黜

過余得見所刻二硯窩詩冊及朱

竹垞先生贈其先人高州太守之作並言其家傳
被火遺書盡焚而硯獨存賦此贈之卽用竹垞韻
燒燈節後雨絲絲有客來過話舊時老屋却餘雙硯在
寒邨影裏一編持高州別字寒邨甬江人物推先輩駕水風流
亦我師新韭黃梁動春酌尊前好和竹垞詩

甬上袁生

鈞

績學工文久不過嘉慶元年

時詔天

卞州縣舉孝廉方正其鄉人列生名以應鄭令郭
君文鏐以聞于上官將膺薦辟逡巡未舉適持其
先人鞠邨先生布衣歌卷子屬題輒題此還之

袁生明德之後人厄塞坎壈纏其身年將五十不見用

衣食奔走徒悲辛一朝示我先人蹟尚寶當年留翰墨
鞠邨先生始作歌歌聲鏗錡出金石果是人間大布衣
鶴書稠疊來荆扉先生累膺薦召官至國史院檢閱生今儒素還未達
季女那免常斯飢我既不能如周公之吐哺又不能如
昌黎之薦士青眼高歌空爾爲眼中之人媿吾子烏虜
袁生袁生寧以布衣終不克上繼爾祖昌其宗

龍井淮海先生祠落成二月四日王述菴利少司

寇至自松江同潘德園庭筠侍御暨陳華南韶華

秋槎瑞潢袁陶軒鈞汪小海淮邵右菴志純楊書

巢秉初俞雲莊寶華錢梅溪泳余女壻施曾培詣

龍井瞻拜祠下酌泉煮茗流連竟日得詩二章

我祖淮海彥名並張晁黃蘇門稱四賢一時何堂堂游
越訪辨才酌泉龍井旁題名鑲石壁作記留僧廊其後
十數載出倖復來杭艱屯中黨旤中道貶括蒼人世多
波瀾辨才亦已亡往事認泥爪遺蹟餘文章耳孫忝竊
祿監司莅錢唐峩峩起崇構簷際雲廻翔神靈庶棲止
一薦蘭杜芳

青浦王侍郎湖干弭車轍武林潘侍御閒居味禪悅同
來拜新祠躡衣蹻磐石吾鄰八九人一一岸巾幘苔痕
印芒屨竹色上瑤席俎豆陳自今風流緬在昔仰觀春

雲藹俛眎寒泉碧高譚愜幽懷梅花落如雪

題李武曾先生小像

卷後有真定梁棠村相國詩
蓋先生召試報罷南歸相

國贈行之作也

風流秋錦畫圖傳朱十才名與並肩白髮灌園三畝宅
先生有灌園圖青春躍馬百蠻烟倦游怕作諸侯客獻賦空勞
月俸錢太息斯人今已矣棠邨留得贈行篇

汎舟出艮山門至皋亭看桃花和蘇潭韻

蜻蛉衝破綠楊烟攜榼同登郭外船一片春波花似海
簫聲吹過賣飴天

樹裏青帘花外邨趙家舊事夕陽昏皋亭一抹山無恙

觀出臙脂照水痕

花落江南苦繫思逢君也唱斷腸詞綠波雙槩人何處

又似恒河照髻絲

時蘇潭有騎省之戚見之于詩不勝根觸

勝事吾鄉一水遙當年慣上木蘭橈春來無限桃花水

添得溪頭幾尺潮

吾鄉許溪堯花最盛故及之

九溪

一路入谿聲泠泠九曲清竹穿斜磴出雲避斷崖生春
雨忽然過春禽相間鳴路逢采茶者繭足踏莎行

松巔閣

傑閣鳥飛外闌干俯萬松翠吞青嶂入濤落碧泉春天

迴惟巢鶴心安欲制龍高僧此趺坐亭午又聞鐘

四月一日爲朱恭人兩週之辰設奠有作

長夜不可醒茫茫又一年孤燈餘白髯萬事到黃泉作
宦嗟余拙持家念爾賢回看殯宮在何日卜松阡
身世同泡影匆匆了夙因他年終伴汝昨夢尚爲人已
分長離別難忘共賤貧鏡中吾更老誰與話酸辛

西湖寶東皋夫子祠堂落成敬舉祀事賦此

公已騎龍薊白雲扶風弟子莫椒芬西州每下羊曇淚
東國誰尋董相墳海內蒼生知姓氏人間元氣在斯文
明湖幾度掄才地依舊青山帶夕曛

吳半舫過余武林解舍卽席話舊有作

春水西湖綠似油故人二月到杭州
回思四十年前事各自挑燈照白頭

篋中舊句萬餘篇添得新詩盡可傳
更向茶檣花幔底看君叉手擘蠻箋

小峴山人詩集卷十一

無錫秦 瀛淩滄

永平磚歌爲蘇潭方伯作

方伯廨舍得古磚永平二字分明鐫皖江湖君

度爲去聲

考定謂是晉惠之紀年牝雞司晨鐘簴壞金墉兆禍紛
戈鋌銅駝夜泣委榛莽雒陽宮闕犁爲田典午距今歷
千載金石銷泐希流傳茲磚墀埴出誰手迺不變滅隨
雲煙落紋斑斕土花繡剗剔一一字不刊磚厚二寸長
以倍光氣煜煜蛟螭纏得一未已且得八羅列直擬義
爻全主人舊是八磚客玉堂視草稱神仙揮毫作歌頃

刻就妙翰親寫鴉青箋畫長高齋出示我峨眉隱隱明

蓬巒

軒名有銅缸一傳是宋時物

銅缸積水墮紅雨花架一丈薔薇

嬌近人好事侈淹雅北平而外孫與錢未央上林卯金
製瓦當無數傳長安其中贗鼎頗雜出傳會往往勞言
詮主人嗜古得真古千秋五鳳同寶旃他時探入武林
志更煩洪邁成新編

北平謂翁覃溪方綱孫謂淵如星衍錢謂獻之坊

會稽四十韻

牛斗揚州域春秋越絕書舊傳王會盛今識霸圖餘洞
穴藏金簡園陵望翠輿尚聞珪錫瑞不見骨專車舟憶
黃龍負田留白鳥鉏梅梁空鼠雀窵石守夔魑風雨羣

靈集球琳九牧儲雲仍到勾踐疆土繼無余烏喙才眞
狡鴟夷術豈疎三年沼吳國一劍刎靈胥甲楯徒雄爾
亭臺竟忽諸鷓鴣飛舊苑麋鹿走荒徂禹蹟滄溟表秦
封鄢社如銘功逾岱嶧篆碣陋蒼沮藥採神山草香浮
酒甕蛆桑田塵世換劫火歲華除僊尉市中隱客星江

上漁

有子陵
故居

巖春喧石臼

葛洪隱處
今爲葛岩

柯笛響絲簾南渡

清談劇東風被襖初鵝籠珍琲貝繭紙重璫璵蠟屐兼
絲肉繙經話筍蔬雪深安道宅竹愛子猷廬勝地佳無
比名流樂只且誰探剡源去合賜鑑湖居苔磴風蘿掃
戴叔倫詩風蘿蓬壺海蜃噓

元微之詩謫居
猶得住蓬萊

白元頻唱

和包賀自相於

孟浩然游鑑湖有寄包賀二公詩

秦系溪堪釣

系號會稽釣者

方干島可挈

方干島干所居也

古今一憑弔興廢重歎歔鬼已

謀曹社民還訪宋墟鵲啼遺寢壤鳳舞故宮虛幾處翔

銀鴈先時葬玉魚夕陽迷古道蔓草徧新畬寂寞潛號

狖蕭寥晚叫鷄紅窗明箇箇畫舫汎徐徐稂穗秋畦長

茶芽穀雨舒樵涇通別港浣女弄清渠材有凌霄箭花

開映日蕖雲門作屏障蘭渚遶襟裾圖畫連城郭煙霞

接井閭千秋懷祖德登眺更躊躇

先淮海公叔父定官會稽尉公省視至越

會稽春詞

柳姑祠前春欲歸越人門巷楊花飛波上鯉魚強尺半

夜來跳過釣魚磯

浣紗溪水照紅顏霸越亡吳事等閒一種胭脂好春色
桃花開落土城山

白蘋風起鏡湖西無數黃鸝隔岸啼畫船打槳唱歌去
勸郎莫過若邪溪

越王臺上鷓鴣飛南鎮廟前春薜肥踏青歸去向郎笑
蝴蝶雙雙上妾衣

早春集古八仙莊湖樓聯句

昨有西溪約忽作西湖游秦隴寒褪柳漸坼春淺草尚
柔潘庭筠遠樹喧野雀纖波蕩輕鷗陳韶丹尋稚川古

玉漱參寥幽項壙共攜山中屐來上湖千樓華瑞潢冰

泮水紋亂日映嵐翠浮邵志純鄰醯煮鮮鯉

五柳居醢鯉魚寂擅

名蠟甕開新筍吳觀人熟禮俱畧意到閒暫偷素孤嶼

緬放鶴三徑無鳴騶潘逸興繼蘇白遊侶招羊求陳題

襟盡跌宕命酒還夷猶項黎白壓大谷柑黃分東甌華

香氣撲鼻觀梅花逗簾簷邵而我愛登眺何幸聯唱酬

吳閒居興已適

潘謂

感遇情難休

陳謂

秦天籟富卷軸

項謂

栖

碧餘風流

華謂

潘縞紵互投贈

吳謂

圖書窮研搜

邵謂

陳詞壇

仰淮海吟櫂遲子猷

時王述莽先生將來杭州

項言尋宋輦道重泛

秦亭舟華青春來堂堂浮雲去悠悠邵後期果宿諾卽

景歡朋儔吳爲問塵中人得有此樂不素

春晴出郭游山寺

難得春陰一日晴便呼小隊出江城茶香邨塢客初到
梅落寺門僧又迎法界頻來如有約花龕重與證無生
何時便脫朝衫去慧遠同尋出世盟

西湖舟泛

管領西泠又一年雪泥鴻爪認因緣每尋蘇白題詩徑
重問鶯花載酒船泥客清尊三月飲殢人新柳六橋煙
幾經湖上傷離別觸撥愁懷只惘然

題芙蓉草堂圖

文嘉爲先九世從祖虹洲方伯作

水風微涼滴輕露屋在芙蓉最深處芙蓉采采放蘭橈
美人如花隔花語芙蓉草堂今在無百年亭榭已荒蕪
只今煙柳迷濛裏剩有文家一幀圖

聞閩齋孝廉依畢制府於軍營以詩懷之

孝廉下第不得志軍門投謁行何之彈琴擊劍自夙昔
磨盾草檄方在茲鷓鴣晝啼楚王宅猿狖夜叫湘君祠
好尋我祖登臨處然竹江邊還賦詩

嘉禾舟思

昨夜與君別孤舟春水生鳥衝飛雨過人背落花行送
客南湖路愁予北渚情風帆指鶯脰又到閩閩城

西湖

嬉春士女徧西湖
酒幔茶檣何處無
南宋官家曾駐輦
認他一幘上河圖

送友之湖南

送君南去弔湘娥
木落洞庭秋始波
我有愁心千萬疊
夕陽樓角亂山多

登塏望越江

絕頂涼颼語塏鈴
闌干曲曲俯樟亭
松杉老鶴晨參座
風雨乖龍夜聽經
潮落海門連岸白
山從天目到江青
閒僧不做興亡夢
一覺蒲團喚易醒

偶然作二首

官齋散衙後几席得虛敞牆陰竹數竿嫩籜忽已長碧
雲在簷楹每作渭川想疎枝時低昂吾亦同偃仰隨月
常窺人含風動成響寥然憂寒玉靜聽忘言象彼美悵
難覲寂寞成孤賞

人生無貴賤賢愚亦同科嗜欲鑿情竅憂患伐性柯大
道貴昏默心外安有佗促促百年內華髮忽已皤聞道
苦不早萬事成蹉跎不獨圭組繼且慙文字多終當泯
諸有聊以養天和

送春

昨夜高樓彈玉箏不知花落徧江城美人夢醒捉飛絮
酒客腸斷聞流鶯青春堂堂去何處白髮冉冉來無情
明年此日又相送回首今年如隔生

鐵生許爲余作龍井圖以詩促之並貽以酒

張顛酒酣弄不律拂拂酒從十指出山人作畫如作書
醉墨淋漓捲蕭颯西湖六月暑鬱蒸索畫笑我非人情
澆君詩腹酒一石對酒或者精神生雲煙落紙起突兀
靈石峯高隔林樾蒼筤萬个秋有聲湛湛龍泓鑑毛髮
山人作畫山靈驚寫罷還應斟醪醑以酒一石換一幅
願君長醉不願醒

西湖醉月歌爲秋槎作

乘月放船船載酒月在船頭杯在手酒酣喝月月墮水
水底光芒亂星斗金風吹波波蕩搖只恐蟾蜍欲遁走
何人鐵篴醉三弄鳳凰夜叫蒼龍吼青天四顧殊茫茫
仄月又落西峰口

湖樓坐雨有作

高樓六月秋有聲湖風挾雨先秋鳴奔泉入水水忽立
濃雲壓山山欲行離披幾處竹枝折掩冉十里荷香生
持竿散髮者誰子樹底一簑舟自橫

夏日獨游龍井作

停策靈石塢行憶歷層磴幽篁亂掃天亭午疑日暝全
身裹綠雲不辨翠微徑溪泉雜疎蟬山風含清磬喧寂
復何有吾欲返吾聽獨坐孤亭上一僧方入定

題朱荔裳先生像

當代論詞伯青齊有大風艱危感羊觸

在刑部獄時有獄中之羊賦

辛苦到蠶叢詩卷干戈後鬚眉氣概中徘徊憶前輩宦
跡浙西東

壑庵訪潘德園侍御不遇

數日不相見聞君住翠微因移湖上櫂來款竹間扉老
屋道書滿白雲心事違閒階空悵望一鶴向人飛

贈吳澹川

吳均天下士歸自鹿門山作客襄漢上脫身戎馬間風塵孤劍在江海幾人閒煙月南湖好秋來且閉關

白鶴歌爲青田端木生國瑚作

芝田有白鶴來巢萬松岡毛羽殊蹁躚千仞看翱翔奈何困飲啄三月食無糧引吭向我鳴側翅多傍徨世間萬事不可料鳳皇苦饑烏鳶飽鶴兮鶴兮奈爾何烏虜吾意其蹉跎

題魏忠節公遺像

倉琅根響傳內操極人竊枋太阿倒狐鼠憑社威鳳摧

蕭艾滿徑芳蘭掃當頭委鬼稱魏公魏公漫欲誇其宗
北魏低眉南魏恥拂衣歸去鴛湖東羅織俄成點將錄
刊章告密胡太酷一網打盡東林徒三木冤沉北寺獄
獄中聞說生靈芝臯陶祭罷同齋咨誰知矯詔出片紙
楊左既斃公亦隨窮陰雲霧天四塞虞淵日落愁雲黑
萇宏血裹眞可憐李固尸橫收不得君不見父忠臣兒
孝子父填牢戶兒從死千秋之名照青史君不見崔呈
秀許顯純乾兒義子何紛紛人頭畜鳴夫何人吁嗟乎
人頭畜鳴夫何人

岳氏銅爵歌

曹操北魏金龜與家故
曹德剛物今歸岳廟

金君家藏銅爵一倦翁小印字不滅阜陵以來重報忠
堂堂子孫薦芳醪三足一柱珍如舞雲雷深護蟠螭跼
麟煊古色歷灰劫還與棗史千秋垂臯亭山邊陣雲惡
聞說錢唐潮水涸白鳧金鴈飛滿天何況區區一銅爵
冬青風雨徒悲哀龍津之劍去復回土花繡出會稽土
神物終不薶蒿萊金君好古世希有銅爵仍歸祠墓守
行人下馬酌南枝一卮當飲黃龍酒

題宋茗香游天台詩後

天姥祠前弔李白詩魂化作天台石天台之石萬萬古
長倚瓊臺弄明月何人却向天台行手把芙蓉朝太清

白雲逢逢滿巘谷逕跨鶴背吹瑤笙天姥前導玉女迎
桃花流水非人情夜半題詩上華頂坐見海色東南橫
詩成咳吐落天外鶴鶻起叫猿猱驚烏庠李白今不死
開元以還見吾子

弔張忠烈公墓

名煌言魯王時兵部尚書

孤臣夜向翁洲泣要保殘明一點血淚痕滴海海已枯
化爲精衛心不滅天風颯颯揚雲旂白楊何處尋西泠
南屏月出山鬼叫荔支峰下楓林青

爲謝香泉題邗江雅集圖

前身應是杜分司曾到楊州折柳枝花月春江如夢裏

青衫憔悴鬢添絲

西風木落洞庭波
玉柱冰絃奈爾何
昨夜瀟湘聞鴈語
琴心飛入客愁多

題王文成公遺像

宗臣遺像鬢毛蒼
公已騎鯨去帝鄉
慷慨誓師傳贛水
艱危得力憶龍場
制科一代勛名在
學術千秋謗猷張
莫道蚍蜉能撼樹
斯文日月耀精芒

送汪小海再遊黃山

黃山山高鏃眞宰
天遣詩人賦雲海
題詩曾訪軒轅邱
一別黃山復幾載
五老雲中笑向人
三姑招爾上嶙峋

朱砂泉邊聞搗藥欲煉丹汞朝僊眞負杖行吟隨處好
無數蓮華插晴昊應騎白鹿餐靈脂更駕蒼龍拾瑤草
此日西泠我送君秋風木葉落紛紛看君再渡錢塘去
歸來贈我黃山雲

海鹽張螺浮先生於康熙初年官給事中以直聲
著旣歸築園曰涉園名人投贈甚富其後人桴亭
學博刻范忠貞宿園中留贈詩及王新城尙書題
咏彙爲一冊示余因賦此卽書圖後余以行部屢
至海鹽未得一過斯園而先生故先高祖鄉會試
同年也披圖展讀有餘慕焉

海國經行處曾聞十畝園却看摩詰畫疑入武陵源鶴
立當時徑鳥啼昨夜邨園卽在邨花溪兼竹港雅尙憶黃

門

諫牘傳青史歸來此卜居留詩聞節使感舊得尙書城

題卷時先生已歿

庾信爲園日陶潛解綬餘故山松桂好吾亦

念吾廬

和吳槎客九日吳山登高見貽之作

何處登臨挾羽翰羨君題壁躡層巒青楓路入蒼厓斷
白日秋懸碧海寒極目江山如此少側身懷抱向誰寬
年來豸繡慚無補猶是浮沉滯一官

爲槎客題小桐谿山館圖

山人著書好家住小桐谿嵐氣穿林合松陰與屋齊
雲孤鶴過傍渚一禽啼白髮吾將隱尋君共杖藜

秋夜聽人說鬼

君豈楊州羅兩峰

兩峰名聘有鬼趣圖

慣諳鬼趣說空空諾舉新

志齊諸記烏有先生無是公詩唱鮑家山月黑圖成道
子夜燐紅怪他色變如譚虎窳窳尊前落葉風

座客有畏鬼者

田山薑先生秋汎圖卷馮鷺亭編修屬題

山薑先生好事者京兆風流傳日下移居詩與秋汎圖
題和紛紛盛騷雅百餘年來人事徂鬲津草堂今已蕪

畫圖亦落他人手生綃尺幘迷菰蒲西湖九月好風日
殘桂空庭逗書帙嘉禾太史出此卷飛入潞河雨蕭瑟
雙埃隻埃車班班廣渠門外誰放船楓葉亂颺驛樓樹
荻花遙蘼津亭煙張颿伐鼓興何劇却爲東南念蒼赤
先生詩中有念東南民力之句誰知當日汎舟人大有他年濟時客
後官貴州巡撫歷少司農

秋幕約諸子游西溪阻雨不果頌秋子誌之以詩
走筆却荅并示華秋槎邵懷粹

西溪溪頭夢飄瞥梅花屢負春時節聞道西溪秋更佳
要放吳船看秋雪
溪有秋雪庵蘆花最勝三十六里煙濛濛打頭

飛絮迷孤篷微茫想像雪川路風流還憶陳眉公

秋雪庵三

字眉公書

天公怪我不一到名山空說秦亭好臥聽一夜雨

蕭蕭明日蘆花定如掃

爲沈秋渚題濯足萬里圖卷

銀潢屈注碧玉流化爲溟渤萬里瀉入胷中秋人生在世不得志何如高臥崑崙邱不然嘯傲凌滄洲嘉禾沈侯負奇氣懷抱卓犖橫九州年垂五十兩鬢風颼颼徒以筆墨干諸侯曩參余幕頗莫逆鏡湖剡水同扁舟月黑夜過天姥宿日出曉躡天童游於時海上方患盜鯨鯨鼓浪鯨鯨愁酒闌抵掌論兵畧倘借前箸非無謀君

今伏處向林壑泥湖一勺浩蕩堪夷猶我家咫尺傍笠澤七十二峰點點如鳬鷖煙波晶渺三萬頃綠水縈繞柴門幽涼風嫋嫋洞庭岸漁人一笛蘆花稠何不與君卜鄰日來往浩歌濯足身外夫何求

梅花道人墓

繫艇胥塘拜墓門道人遺蹟斷碑昏秋深橡樹煙中寺春落梅花雪後邨一盞獨尋衰草路六陵曾酹杜鵑魂塚中欲喚先生起重寫瀟湘帝子痕

題尋真圖

未採山中藥先看洞口霞千尋石梁水一箇武陵槎世

事雲如狗仙人棗似瓜不須愁白髮就爾飯桃花

題王百穀贈馬湘蘭詩卷後

冶城煙月板橋霜家住南朝石子岡才子生耽詩酒社
美人死占綺羅場天教俠骨留紅粉自許芳心在碧湘
今日荒莽尋孔雀蕭疎還剩幾垂楊

壽鮑淥飲七十

名山事業老蟬魚萬卷琳琅重石渠已是九重知姓氏
不須應 詔上公車

淥飲藏書甲江浙會進
呈錄入四庫全書

語溪高士好相於讀畫風流足隱居

謂方蘭士茶竈筆牀行

樂地一編笠澤錄鼓書

家貲已爲購書貧，賸有清癯鶴立身。
愛向西泠橋畔住，夕陽樓上倚詩人。

淥飲短而癯，以夕陽詩得名。

人間何事勝丹鉛，白髮飄蕭七十年。
不用眞形圖五岳，鄉嬛古洞住神仙。

懷徐午亭蜀中

蜀道重經劇險艱，罷官淪落鬢先斑。
馬行雙峽天如井，人出層嵒水似環。
殘雪叢祠魑躑躅，亂雲深箐鳥絲蠻。
全家妻子應無恙，戰鼓頻年尚未閒。

北園圖爲陳雲樵騎尉作

北園者前僉都御史山陰陳南麓先生所居之

園也新羅山人華秋岳爲之圖今園寢廢而圖
存先生之再從孫廣寧處廣寧故書生能世其
家以父卹蔭襲雲騎尉今爲余屬海塘營守備
萬壑千巖裏林園偶乞閒家臨鑑湖水門對剡溪山佛
耳泉名穿泉碧松身臂石斑新羅傳畫本一角寫孱顏

何似輞川莊青山鹿柴傍曾傳長孺直不數季真狂舊
業莓苔冷秋風杞菊荒還餘老孫子把卷話斜陽

白雲圖爲雲樵作

雲樵所後考殉難臺灣本生考
令蕪湖又歿於官屬友作是圖

以志
痛

子舍淒涼隻影寒艱危人世急風湍天邊絕島愁雲黑

衣上滄江血淚丹萬里荒燐烏夢斷百年華表鶴歸難
孤兒兩地傷心處寫入蒼茫不忍看

贈陳生

文杰

時余將之京師

淮南阮公視浙學公所賞識皆俊髦告我陳生才更好
少年放筆殊雄豪文場拔幟誇第一鉅鹿酣戰軍聲鏖
投詩謁我出詩卷袖裏一一珠璣拋江河萬古別流派
將廟屈宋窺劉曹就中長歌最傑出廣座會賦將軍刀
爲阮學使賦血腥土繡髑髏泣星斗墮地光搖搖近來詩家
頗錯雜千秋風雅誰爬搔繁音吾欲洗箏笛正聲若個
吹笙匏西冷多才甲兩浙陳氏之子眞清標金牛湖頭

我將別天意作雪風刁騷張帆伐鼓驛亭路送我此去
乘吳舫採詩可以貢

天子生乎豈合終蓬蒿

海寧州城外有伍相國廟蓋公今爲海神州人祀
之以捍海者歲久不葺余屬海塘營守備陳廣寧
新之賦此

破楚門東莽寂寥鹽官遺廟枕寒譙城頭烏鵲啼初歇
江上鷗夷恨已銷神帳衣冠亡賜劔靈旗風雨捲歸潮
從今社鼓喧殘臘小海吟成當大招

西湖看楓葉

霜楓萬樹夾煙堤渲染秋林葉葉齊屋角好山攔不住
斷霞紅過六橋西

寒煙古寺夕陽邨樹底明湖半繞門勾引漁船此中泊
桃花流水似仙源

帽影鞭絲入塞山亂雲楓葉寫荆關記曾立馬千峰赤
野燒粘空接朶顏

偶向西冷繫短篷清霜九月戰西風農家亦有谿湖曲
蟹舍漁庵醉晚楓

題征西圖爲故大學士松莊查公作

瀚海何人第一功相臣銜 命領元戎衆推名士如諸

葛路有羣羌拜令公阨塞山川歸玉帳大旗日月映瑯
弓燉煌萬里今無外曾見沙場戰血紅

尚紀 王師出玉關 先皇廟畧定天山忽來絕域荒

烟外爭踏重圍萬仞間世羨功名看 國史我從圖畫

識公顏傳家九石貽謀在長使清風動百蠻

公軍中得九石歸作

九石圖

爲馮鴻臚星實題夢蘇圖

瓣香坡老一編讐私淑心情幾十秋椽燭著書風幔底

五更清夢到眉州

君注蘇文忠集已刊行

紛紛施顧幾覃精著述今看勝百城應識過庭家學在

丹黃先注玉溪生

尊甫孟亭先生有玉溪生詩注

崇祠新築傍西湖三過堂成亦有圖櫺李煙波武林月

夜來儂亦夢髯蘇

余方於西湖建文忠祠並重修嘉興三過堂

舊時秋夢了何因七百年來跡已陳曾踏峨眉峰頂雪

風流玉局是前身

君曾視學蜀中

庭梅一株將放余手植也將與別以詩志感

一株蕭散似林丘蓓蕾春風小閣頭後夜相思感離索

紙窗明月夢羅浮

卽事書感二首

蛛網沈沈月映閨頻年箱籠閉深幃忽緣嫁女搜卿篋

忍見當時舊嫁衣

男婚女嫁記從前了不關心事
事全今日向平成我獨無卿始更識卿賢

薄暮過塘栖潘德園侍御汪小海明經袁陶軒邵右菴兩徵士來晤云將送余之嘉禾

武林門外征帆重回首西湖已如夢
船尾殷勤湖上山無數煙嵐尚相送
落日寒楓滿驛樓須臾山亦暝如秋
人情更比青山遠直送行人下秀州

將到家門有感

念昔之官日扁舟手共攜傷心還故里
無路覓賢妻寂

寂長天鴈荒荒遠市雞百年同易盡生死理應齊

小海邀同德園諸君置酒煙雨樓餞別賦此

射襄城頭天欲雪鴛鴦湖邊人欲別欲別徘徊且復留
置酒高樓送行客樓上賓朋互勸酬樓前碧玉寒波流
并刀能翦湖水斷不斷萬古之離憂搥鼓津亭喧鷁首
開颿怕見津亭柳誰道清尊蠟釀濃故人情更濃於酒

舟雪

松陵江上繫寒篷蠟囊初開酒已中聽得吳孃夜深語
三更飛雪滿垂虹

寄楊荔裳方伯時在四川佐勒制府軍事

承明記得共朝參一別何緣更並驂幕府舊依嚴僕射
荔裳官中書時軍麾仍佐杜征南頻年人望休輦鼓此
卽爲制府幕客日君還倚劒鐔遙指旄頭星落處亂山如馬是鳧蠶
詩成橫槊尚鳴笳井絡天彭鳥道斜雲棧旌旗連二華
夔門壁壘控三巴聖朝民力寧憂竭大將兵威必愼
加京觀鯨鯢原赤子焚兼玉石亦堪嗟

山夜

寒風吹女蘿山鬼夜來語燐火閃青紅精靈此中聚

山寺

不知何代寺一水繞孤邨花落水中徑春鶯啼寺門野

僧逢客少古佛訝塵昏尚有殘碑碣模糊不可捫

卽事

垂楊蘸得一絲絲柳外家家叫畫眉更愛溪頭好山色
水仙祠下泊多時

過顧響泉觀察書齋以詩悼之

草堂尊酒記留賓舊事關心跡已陳詩家定應逢故鬼

觀察輯梁溪詩鈔成聚諸家詩埋之曰詩冢歸航那又哭斯人到今西蜀還

留像從此東林少問津最是狂言能恕我知君學問到

深醇

副使家聲尚未湮

謂洞陽先生

惟將忠愛答君親

忠愛觀察堂名歸

田已了青山願拜石難留白髮身

洞陽先生祠內新構拜石山房余爲之記

四海誰能識懷抱一棺竟已斷音塵
菟裘我欲營三畝

不及追從更卜鄰

溪上訪友

乘月夜潮上煙深林火微
卸帆過荻渚移櫂近漁磯
一犬隔村吠故人何處扉
田家酒正熟對酌定忘歸

感舊

門對青山屋繞谿如眉
月挂小樓西廿年重過傷心地
蛛網塵昏燕啄泥

到家三首

薄暮過武邱橫塘晚煙羃三更津鼓喧倏忽到南郭支
枕雞漸鳴披衣人欲作推篷見古寺寒林日色薄喜與
鄰里晤握手一笑噓一別祇四年門巷恍如昨 皇恩
許過家人道還家樂誰知游宦心默默傷寂寞

先人有敝廬百尺蔭長松如蜎蒼鬣張謾謾生悲風松
下數間屋蕭條兩殯宮嗟我妻與弟先後埋蒿蓬骨肉
苦凋喪長恨焉能窮我學釋氏灑萬事歸虛空人生非
金石吾命亦有終無如念夙昔百感集寸衷終難了生
滅涕淚仍沾膺

青青橫山陽上有先人墓馬鬣俛長谿岡巒亘回互祿

養嫗未能終身有餘慕頻年缺拜掃稍稍事封樹麥飯
銜君恩展祭愜懷悽松阡又當別欲去屢回顧吁嗟
人子心百年感霜露

一惠山訪梅

雪色入山深梅花白一林影橫曲磴外香在寒蘿陰明
月此相訪美人何處尋忘言結幽契寂寞彈孤琴

視士蓮弟葬

十五年前別今朝送汝來憐余成後死有弟已先摧

謂靜

涵幸耐先人葬

耐葬先曾王父墳塋之旁

難禁病婦哀憑棺盡一哭

白骨早青苔

鄉園

鄉園偶適野阡陌見耕舍拙宦苦多累老農慙不如溪
邊沙鶴聚柳外渚禽疎樂事吾能領終當學荷鋤

移居二十韻

平生本乏買山貲草草茅茨比卓錫却爲過家新識戶
漫誇遷木賀盈楣百年拓落違三畝口辛勤借一枝
廚竈乍謀忙婢僕餵餽分饋到親知庭除灑掃惟煩弟
堂構經營暫付兒仍舊詎同長府作苟完聊學子荆爲
不須宋桷雕鏤侈倘設牆垣粉堊施擇地僅如蝸立壁
移巢差喜燕將雛俸緡已損裝原儉逋券重添囊更垂

屋故鄉氏產直四千金容膝便稱藏畫舫遮頭權作讀
余俸錢不敷假貸予之

書彩疑牽岸上舟如葉免寄人間屋下籬栽竹恰當殘
臘候看梅猶及早春時安牀到處常隨分問舍由來豈
素期玉局幸無鄰媼泣相如慣被富人嗤浮雲冉冉春
如夢舊事茫茫淚有絲行馬人從矜第宅磨牛吾自笑
生涯賃春廡下曾偕婦採藥山中更挈誰歸權莫嫌移
具少辭鄉又惜挂冠遲時余將入都只看傀儡當場戲幾見
楸枰近局碁是屋向爲薛氏所築落成時演劇延客時
余甫八歲隨先曾王父往觀今兩易主矣

却望故居纔隔巷喬松千尺映鬚眉

入都別俞依樂

少壯共鄉閭廿年踪跡疎何期新卜築忽近故人居暇

日每過訪先生常晏如詩從前輩得屋是勝朝餘室小

惟容膝家貧慣茹蔬雖然雙眼暗還把一經鋤

君自曩課孫

詰晨星散遺文祕笥儲梁溪諳故事笠澤訂叢書隔岸

簫聲寂

明俞是堂廉訪有園在旱橋徵歌選伎君祖父心先生有頭白錢翁親聽得月明涼夜聽吹簫

句當窗月色虛青燈猶是好白髮不勝梳昨共尋蕭寺

無勞命筍輿撫松多躑躅看竹更躊躇鶴叫吟壇廢烏

啼舞榭墟夢爲莊子蝶釣憶任公魚冉冉人同老悠悠

歲忽除近來重惜別歸去更相於新水桃花漲春旗穀

雨舒吳均無恙在攜茗一軒渠

謂半舫

雪浪菴

宋蔣文忠重
珍讀書處

前賢讀書處巖半有茆莽石塢路三折野梅香一龕簷

前太湖雪屋後夕陽嵐苦茗僧能煮山泉味最甘

菴僧
以種

茶爲
業

五里湖望湖上諸山

凌晨理孤櫂橫塘恣游衍殘冬天氣佳煙輕櫓聲輒波
紋靜如縠習習水風善青山如美人連峰何婉孌惜別
四五年山色復淩緬娟娟拂修眉一一掄秀鬢扁舟故
洄沿青山亦流眄人如出岫雲終當返層巘何年遂初
服峰峰展游踐

過揚州

人生踪跡感浮萍，煙月揚州又放船。
過客帆遮瓜步綠，隔江山到蜀岡青。
無愁天子荒斜冷，薄倖詞人舊夢醒。
笑我匆匆打槳去，歌聲閒殺竹西亭。

曾運使賓谷邀余觀劇未赴

康山二首

竹西歌吹綺羅春，腰鼓琵琶老此人。
名士風流愛南國，逋臣家世本西秦。
片言曾救同文獄，一曲還留未死身。
彈到中山狼故事，料應對酒倍酸辛。

從來樂府說康王，跡到飄零更擅場。
好似升菴謫溟海，何殊子美在滄浪。
一編作乘君無媿，

武功縣志對山所撰

七子論

詩我未忘只此揚州卷石地略如太守舊山堂

太湖口

便欲浮家去澄波蕩鏡匿舟移太湖嘴山出洞庭尖落
日明漁滬秋風動蟹簾好尋沽酒肆邨舍有青帘

途中雜咏

年來多病未休官祇覺抽帆到岸難怪我鬢絲憔悴甚
從教西笑入長安

新營燕壘畫橋東

余新居在虹橋之東

草草茅茨拓半弓應笑辭

家緣底急梅花時節去匆匆

九峰月色澹模糊去掛東風十幅蒲最是有情拋不得

西湖別却又蓉湖

暫時小別亦銷魂冷到心窩酒不溫
苦耐香殘燈又灺幾番風雪送黃昏

揚州已過近淮干料峭春風分外寒
最是江南二三月好花都讓別人看

別時楊柳未依依竚盼飛花作雪飛
湖上青山先有約好留眉黛待儂歸

新豐

小市魚蝦向晚喧新豐古岸落潮痕
斜陽閃閃烏鴉背樹裏青旗賣酒邨

渡黃河

誰唱公無渡茫茫天上波風聲寒白日春色斷黃河幾
費宣房策猶聞瓠子歌水衡錢百萬沈璧竟如何

沂州晤洪桐生太守

皇華昨歲到西泠湖上欣看使者星

桐生以乙卯典試浙江

不道

褰帷臨大郡又教對酒話郵亭重尋舊夢頭俱白苦憶
前游淚獨零沂水春風開絳帳曾隨先子侍譚經

先大夫主

教琅邪書院最久

武侯故里

在沂州諸葛城

蜀相長已矣三分霸業終荒城尚諸葛舊事憶隆中軍

壘星精實山祠羽扇空千年桑梓地遺碣魯門東

蒙山

千仞削芙蓉居然小岱宗巖留太古雪瀑挂亂崖松絕
壁吞溟渤荒城壓附庸顓臾原蕞爾得此亦雄封

寄徐閩齋軍中

帕首弓刀曉帳寒短衣匹馬傲儒冠詩人例得從軍好
已博頭銜五品官

三楚春來息鼓聲知君猶是戍鄖西戰場多少無頭鬼
月黑燈昏不住啼

泰安道中寄蘇潭

武林門外客將發故人餞我西泠船酒闌更賦贈行句
笑我却少留別篇別來匆匆春已半黃河以北冰初泮
且看齊州九點煙回首故人能勿戀西泠此日風光妍
杏花舒靨桃欲然上年臯亭看花好臙脂遙浸玻璃天
臯亭山色常如舊又到臯亭看花否幕中佳客胡與袁
胡維君虔
袁陶軒鈞應放蜻蛉同載酒楊柳西泠憶我無清和四
月盼歸舫鱗魚入饌杞杞熟爲我重開櫻筍廚

京師雜詩

薄宦曾經十六秋長安到處雪泥留九原不作糟糠婦
爲道秦嘉更白頭

古寺東風破綠苔
天桃穠李倚雲開
劉郎舊日看花眼
重到元都觀裏來

天街閒聽曉鐘聲
宮漏沈沈紫籙清
金爵觚稜殘月
裏記曾橐筆侍承明

蘭若城南粥鼓喧
相公散直訪祇園
閒花落徧沙隄路
一片斜陽覆盜門

稻文恭公每以花時偕余過崇效寺看海棠今文恭已歿四年故云

阮生自昔哭途窮
最感恩門拾爨桐
馬過西州餘一慟
再來不見竇扶風

過東臯先生故邸

新漲西湖綠半篙
春來誰上木蘭橈
段家橋北蘇堤上
瘦盡東風有柳條

五年不見法時帆祭酒詩懷老一龕別後吟囊添幾許
西山簾額映松潭

城南十笏阿儂家曲曲闌干已字斜歸日防他春事了
一叢開過鼠姑花

懷龔海峰上年海峰隨制府宜公防守楚境今聞
自楚入秦

夢憶慶陽守從戎經二年楚江昏似墨秦樹遠於煙消
息渾無定音書竟少傳方聞黑山賊烽火近藍田

城南雅游圖題句

勝流日下共驂驪竹樹千竿水一潭絕似西園傳雅集

去天尺五是城南

點綴風流入畫圖
筆牀茶竈佐琴壺
如何四五年間事

已似黃公舊酒罏

時李介夫已歿

靡蕪綠徧楚王城

徐明齋在楚北

蜀棧吳雲遠客情

張船山還蜀劉澄齋

王揚甫俱在江南

剩有何家好兄弟
題詩常伴法司成

衫袖閒披紫陌風
花前少長一尊同
當時儻有儂參座

論齒應稱老醉翁

諸君年齒俱少於余

西涯詩

西涯者李文正公舊宅
卽今積水潭法祭酒時

帆嘗集友人觴咏於此
併繪西涯卷子繪文正

像於幘首賦五言詩三章以紀之余爲題此得
七言律二首

一潭積水問西涯正德年間舊相家禍起中涓狂似獬
憂深元老淚如麻谿邊有屋容休沐門下無人不駐車
國是調停賴公在子規何事怨長沙

吾鄉點易舊臺荒曾奉茶陵一瓣香謂邵文莊公何幸前朝

留雪印重教此地仰靈光寒邨樹暗麕啼月公葬長吾鄉古

寺松殘鶴叫霜宅故隣慈恩寺難得司成表遺蹟人人都識午

橋莊

題趙恭毅世德詩卷

詩爲恭毅撫浙時杭人項溶集趙松雪千字文作恭毅會

孫味辛舍
人藏之

曩余奉 朝命歲紀在癸丑舍人贈先集攜之赴浙右
盟手再三讀識公十八九繼登吳山麓崇祠鬱林阜公
去近百年俎豆亦已久舊社思樂公殘碑題峴首傳芭
喧神絃焚香薦圭卣今年歲在戊復向京華走訪我宣
武坊舍人重握手春風吹庭樹留連共杯酒更出世德
詩屬余題其後化貪勵廉節懲澆返淳厚下令若流水
有孚自盈缶詩迺頌德不去口千文集松雪磊
磊燦星斗余本鄉後進之江忝職守監司秩較卑有印
亦繫肘察吏別淄澠觀民辨良莠或懼戎伏莽或歎星

在留曷以稱旬宣曷以整綱紐荏苒四五載捫已常自
咎所至仰遺澤政蹟我何有竊聞地方蠹姦胥叢弊藪
噬嚙等豺虎騷擾到雞狗慾壑填脂膏比戶括篋搜官
旣弄股掌民悉供躡蹂苟非鷹用擊何由鳥斯斂浙中莊長
一役最爲民害余首請大府革除而痛懲胥吏之黠者我言敢質公當不棄敝帚
力微慙綆汲才弱愧蚊負作詩還舍人附名庶不朽

清明後三日同趙味辛何蘭士小集不繫舟遲法
時帆葉雲素不至

吾輩眞如不繫舟百年身世感浮漚重逢舊侶萍根合
回憶前蹤雪爪留風雨一尊連上已鶯花三月夢杭州

人生作達須行樂莫更良辰負勝游

擬訂諸君上巳崇效寺看花

西直門外看桃花歌

西山如屏翠色不可遮十里五里一帶連平沙何人潑
下胭脂數十斛染出千朵萬朵明奇葩既非元都觀裏
好顏色亦非武陵洞口浮僊槎疑是葛洪勾漏親鍊就
鮑姑裙上灑徧真丹砂不然號國朝天愛脂粉塗朱也
復兩頰頰如霞沈香亭上好伴玉環醉卯酒未醒睡臉
何天斜惜少豪門錦繡施步障并無紅袖油壁停香車
我來策騎飽看意亦足江南歸去合向朋儕誇壚頭沽
酒酩酊且復爾遙指青帘搖曳橫丫叉此間頗似吾鄉

濟溪景樹裏只欠幾個漁人家祇恐明日東風便狼藉
飄藩墮溷再看風中花

不繫舟卽事三首

屋小如舟僻似邨落花無數擁籬門春明一段添佳話

慣有詩人雪爪痕

前年王述菴少司寇來京寓此

先生到處有行窩十笏吟廬挂碧蘿共是芙蓉湖上客

月明疑汎白鷗波

不繫舟者余門人俞東川寓齋也劉石菴相國爲題額

骨肉關情數鴈行長安何幸又聯牀平生兄弟相逢處

却把并州作故鄉

會余弟小泗自江西至

寄孫淵如觀察

漫詡曾中富五車嗤君偏未讀河渠好官留得頭銜在
我勸先生再著書

別君恍惚隔三生那得相逢話舊盟休爲雞蟲爭得失
詩人應視一官輕

張訥齋罷官以詩寄之

正憶張平子匆匆忽罷官歸應脫屣易貧只買山難身
世況多累家鄉恐未安幾時杯暫把入口返江干

留別小泗

辛苦憐吾弟年年困折腰風塵尚卑賤絲鬢漸蕭騷公
事如能了歸期或未遙西湖對牀好遲爾話連宵

重游崇效寺

方丈禪燈叩導師茶煙午榻話前期海棠無恙花明眼
白髮重來又一時

送春

落花無計挽芳時祖餞匆匆付柳枝南國清尊看欲暮
東風昨夜怨將離一年殘夢春如水三月新愁鬢有絲
市上簫聲樓上笛多應吹出斷腸詞

揚州道中寄懷楊甫

上年臘月歲云徂扁舟我別西子湖王郎咫尺不得見
淡煙寒日迷姑蘇今年遄歸自京洛柳花三月飛滿塗

揚舲將次廣陵郭不日又過吳王邗王郎官壓百僚底
懷抱未免多鬱紆吾輩本非食肉相丈夫定有封侯顚
我年已衰君未老腰間寶劒懸珊瑚遭時未偶且躄屈
打頭有屋譚黃虞江南趁此好風日枇杷正熟櫻吐朱
五茸城邊啟窗牖橫雲山色明雙臚開樽絕勝俗客對
紅魚綠酒攜妻孥墨琴弄墨爾高唱此樂頗覺人間無
我詩寄爾爾然否開緘一笑應軒渠

渡江

西津古渡落帆喧飛盡楊花捲雪痕六代江山春命酒
百年絲鬢客銷魂雲移暝色歸京口雨挾潮聲下海門

數遍郵亭七十二聲風簾又黃昏

京口

天塹平看鎖鑰重山連鐵甕峙崇墉半颿風色春雲弱
夾岸花陰暮雨濃人去西津三月渡僧撞北固六朝鐘
滄江我欲乘黃鵠海嶽菴前訪舊踪

丹徒道中

雲連水郭上潮痕丁卯橋頭問許渾客裏懷人芳草路
江邊中酒落花邨橫塘細雨鶯啼樹古社春風燕到門
明日晉陵山色好歸家猶及話雞豚

戊午四月一日先妻之歿已三週矣以詩哭之

結髮爲夫婦重泉忍棄捐吾衰餘一哭而死竟三年歸
及營齋奠秋應卜宅阡所欣十笏地卽在汝家前

虎丘謁白刺史祠

頻拜孤山像三吳祀事同人懷長慶後地在武丘東杭

郡兼蘇郡韋公又白公

蘇舊有韋公祠在郡學內
今白公祠則蘇州守新築多勞

賢太守蘋藻薦秋風

懷杜閣

匹馬東游日公會到劒池江湖隨地闊稷契少人知飯
顆生原瘦衡山死更奇荒丘拜遺像如在草堂時

仰蘇樓

公本杭州守茲邦宦跡無却緣祠少傅亦爲肖髯蘇星
斗貴長在風流故不殊樓高如海湧百尺峙中吳

本覺寺訪三過堂遺跡

南湖無恙柳絲絲柳外招提隔水湄偶卸吳帆尋構李
曾聞蜀叟話裁眉寺門寂寂歸雲在人代茫茫有鶴知
七百年來彈指頃漫捫蘚壁讀殘碑

小峴山人詩集卷十一